



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 3 Yangia anidakangma : Tir Yimym

tir_yimym

tir yimym

TAPAK 8



Justice Varma anema bushisüngdangtsü
atema committee tentetogo

Gill nem ICC men's Player of
the Month naroküm agütsü



VOL. XXII ISSUE NO. 299 (ADOK 299) DIMAPUR RASEMNÜ (WEDNESDAY) LUROI (AUGUST) 13, 2025 ₹ 5.00

State sorkar sentong nung shilem magitsü 5 Tribe CoRRP-i tuyur

Dimapur, Luroi/August 12 (TYO): Nagaland sorkar mapa nung kin kar asoshi menden wazüka yuja aliba lepa repringhsitsü kin pongu sangeri state sorkar nem takhangba agütsüba nung temulung süa telangzüba manguba ajanga August 9, 2025 nü joint meeting nung ajaki mulunga pangjemba ama August 15, 2025 nü Independence Day densema State sorkar sentong ajunga nung shilem magitsü totuyuba ka 5 Tribes Committee on Review of Reservation Policy (5 Tribes CoRRP) ajanga agütsüogo.

Reservation Review Commission shimyim repringhsia aser iba Commission nung CSOs nungi züngsem shimokba agentsü akhangba ama state sorkar nungitelangzüba tajung ka magütsü tashi State sorkar sentong ajunga nung mapang telatet makai shilem magie alitsü, ta ashi.

Reservation Review Commission kümsük ya ita trok alema maotsüla, State sorkari Reservation Review Commission telemtetba census renemba den sendakteptsü temulungtetba nung lira Backward Tribe Reservation Policy ya agiena atatsüla, ta 5 Tribes CoRRP ajanga ashi.

State sorkar sentong ajunga nung shilem magitsü ta asüba ya State sorkari ken o mesüra sentong balala nung senden mesüra sentong ayongzükb kecha nunga shilem magitsüba indang lir. Anungji August 9, 2025 nü pangzüng renema aliba ama iba totuyuba sülen anidaktsü asoshi Districts ti - Kohima, Mokokchung, Wokha, Tseminyu, Zunheboto, Dimapur,

Chümoukedima aser Niuland nung pei sasep frontal organizations aser subunits ajunga nem totuyuba agütsütsü 5 tribe apex bodies dang ayongzüker.

August 15, 2025 nü Independence Day nung nüburtemi pei sasa sentong nung shilem magitsüla aser iba osang ya yimtsüng sasep tashi nem sangoktsütsüla.

Kecha yimya nunga cultural troupes temi shilem magitsü, school aser college temi pei kakat reju alema oa iba anogomung sentong nung kaketshirtem tashiyim amshia shilem magidaktsütsü kaketshir tentet temi meita atatsüla.

Kecha nunga mepetmesü madoki tesunep nung shilem magitsü asoshi ajaki yimya tajung amshitsüla, ta 5 Tribes CoRRP sangdong ajanga ashi.

Ao Senden-i Sorkar sentong kecha nungashilem magitsü

Dimapur, Luroi/August 12 (TYO): 5 Tribes Committee on Review of Reservation Policy (5 Tribes CoRRP) ajanga August 9, 2025 senden nung pangzüng renema akaba aser kin pongu apex Hohos temi State sorkar sentong ajunga nung shilem magitsü totuyuba August 12, 2025 nü agütsüba ama, iba ken o mebetet tashi sorkar sentong kecha nunga Ao Senden aser onok kübok aliba Civil Societies katia shilem magitsü ta osang sangoktsür, ta Ao Senden ajanga Deputy Commissioner, Mokokchung nem tezüluba ka agütsüogo.

Home Department ajanga l-Day asoshi metetdaksür

Dimapur, Luroi/August 12 (TYO): Home Department ajanga sangdong ka nung, taoba mapang metetdakja aliba ama Civil Secretariat Plaza, Kohima nung August 15, 2025 anepdang 9:00 ako nungi tenzüka Independence Day sentong agitsü aliba nung Kohima nung aliba department ajunga nungi ketdangsür aser staff ajak adentsüla, aser nüngdakba mera agitsü atema Home Department

nem attendance sheet agütsütsüla, ta metetdaksüogo.

Deputy Commissioner ajungai pei jurisdictions kübok department ajunga nung ketdangsür aser staff ajunga dang Independence Day anogomung sentong nung adentsü asoshi tutuyuba agütsütsüla. Nüngdakba mera agitsü asoshi Deputy Commissioner temi Home Department nem attendance sheet agütsütsüla, ta sangdong ajangasa ashi.

Kohima district nung ASF puteta lir

Dimapur, Luroi/August 12 (TYO): Kohima district kübok Kigwema aser Mitelephe yimtsüngtem nung African Swine Fener (ASF) putetba mechi Deputy Commissioner, Kohima ajanga sangdong ka nung iba tashidak azüoktsü asoshi item yimtsüngtem ya Infected and Surveillance Zones ta sangdongogo.

Chief Animal Husbandry & Viterinary Service, Kohima ajanga shiti züluba nung ajemdaker, Kigwema aser Mitelephe yimtsüngtem ya Infected Zones ta sangdongogo, aser yangji iba

tashidak puteta aliba temeket kilometre ka telungzüc adentsü.

Iba temeket tesem nung Surveillance Zone amenoka lir, koba tashidak putetba tesem nungi temeket telungzüc kilometres 10 (Infected Zone tema kilometre 9 telungzüc) alitsü.

Iba tashidak azüoktsü mechi iba zones nung tang nungi tenzüka tarutsü nung sangdong ka magütsü tashi ak alepba, ak aser ak chanu bener aruba aser aoba, ak aser ak shi belenba ajunga nung tenokdangba agütsür, ta sangdong ajanga ashi.

GHS Nsong nung subject teacher mali kaketshir timtemer



Nsong jila nung tekeraba nung subject teachers tem yoktsü takhangba agüja rally ka ayongzükb noksa nung angur. (Nsong, Aug. 12, 2025)

Dimapur, Luroi/August 12 (TYO): Government High School, Nsong nung 2023 nungi subject teachers peria maliba ajanga kakat shisatsü sayuba aser angazükba nung tetsükdaktsü ajurua kaketshirtem academic tsütsü timtem lir.

Tanü osangbener senden ka nung jembidang Nsong Student's Union tir Rangtalak-i ashiba agi, iba timtem mapang talangka senzuka yuja arur aser tezüluba balala nung timtem lemsatepaka department-i mera shidak magiba ngua tezü atanger.

Kaketshir aser civil society temi August 4, 2025 nü Project Director, School Education dang anogo 7 tsüngta GHS Nsong nung Science aser English tesayur yoktsü takhangba agütsü aser yamaji meinyakra onoki onok telemtetba nung mera agitsü aser tanen magari senzuka yutsüba ajanga timtem adokra department khuret asütsü ta shia liasü.

GHS Nsong nungya Headmaster mesüra Assistant Headmaster mali, anungji school nung academic tsütsü

ketdangsür mali yutsür. Non-teaching staff temi class tilatem sayutsüsa akumer, koba education standards nung aibelen aser tesayur aser kaketshir mezügmeshi lir, ta ashi.

Mongulbarnü Nsong Town aser Nsong village nungi kaketshirtem aser putu menden, Nsong Area Public Organisation aser Nsong Town aser Nsong village nungi tetsür tentet temi Nsong jila nung rally ka ayongzüka tekeraba nung subject teachers tem yoktsü takhangba agüja liasü.

Assam district kar nungi arur nem agütsüba ILP agentsüla: ILRC

Dimapur, Luroi/August 12 (TYO): Naga Students' Federation (NSF) indang Inner Line Regulation Commission (ILRC) ajanga Chief Secretary, Government of Nagaland dang July 29, 2025 nungi Eviction agiba Assam district tem nungi arua alir indang Inner Line Permits (ILP) agienjang ta tezüluba ka agütsüogo.

Assam-Nagaland arütsü anasa Golaghat district kübok Rengma Reserve Forest, Uriamghat area nung arem lir bighas 11,000 dak tema ozüng alema agir aliba nung tenük yoker Assam sorkari July 29, 2025 nü evction drive tulutiba agia lir. Sepait meyirijang aika aser machinery tulutem amshia iba operation agiba ajanga central Assam district tem nungi aser Bengali oshi jembiba Muslim nunger kibong aika dak kongshia tesem balala nung jenoka lir, ta ashi.

Nagaland ya iba eviction zones

anasa lir asünung, item district nungi nisungtem Inner Line Permits (ILPs) amshia aittsü merangtsü akok, koba ajanga iba ozüng nükjidong aser lispour security nung kongshitsü. Item nisungtem arutsü teimla nung state-i arütsülen aliba district tem dang tekumdangtsü shia lir.

Anungji July 29, 2025 nü nungi evction operations tagidak aliba Assam district tem nungi aruba nisungtem nem ILPs agüja aliba ajunga tangsa agentsü akhangar, ta ILRC shiti nung shia lir.

Iba ozüng mapa kuma inyakba nung metokmeperi malitsü mechi iba anogo nungi agütsüba ILPs tem mamshitsü ta sangdongtsüla. Tensa tajungba makum tashi aser kanga junga jangjatepba mera ka mamenok tashi evction drive agi kongshia aliba district nungi aruba nisungtem nem ILP tasen agütsüba anena atatsüla.

Assam sorkari evction drive

agiba ajanga tesem balala nung prokshia aliba data lemsateptsü asoshi Assam ketdangsür den amalitep akatsüla, aser item tesemtem nungi arur nem ILP agütsü tenzükshtsü asoshi state sorkari teti tensa repringhsitsüla, ta NSF indang ILRC ajanga ashi.

ILP system nükjidong wazüka ayutsü, region nung petsaprongba mapang Nagaland sobaliba aser nütsüng yongsük kumzüka ayutsü asoshi item mera ya kanga nüngdaker. Awareness campaigns, verification support aser nüburtem den amalitep akaba ajanga item inyakyim mapa kuma amshiba nung Nagaland sorkar den yariteptsü ILRC aser NSF renema lir. Anungji iba tensa nung tapet mera agitsüba sayua nai telangzüba tajung tekeratiba nungi agütsütsü mepishir, ta ILRC ajangasa Nagaland Chief Secretary dangi züluba shiti nung shia liasü.

State nung ESI scheme agi nisung 17,965 ajangzüker

Dimapur, Luroi/August 11 (TYO): Employees' State Insurance Corporation (ESIC), North-East Regional Office ajanga August 12, 2025 nü Dimapur nung Mega Awareness-cum-Outreach & Preventive Health Check Up Camp ka takok ngua agiogo.

Region nung stakeholders, employers, employees aser beneficiaries atema ESI Scheme aser yangji teyari tabu balala aliba indang awareness agütsütsü nükjidong nung iba sentong ya ayongzüka liasü.

Iba sentong nung tawa

semzükb SPREE 2025 scheme indanga Employers dang rasaa ashi.

Sentong nung tongti tesemdangar Insurance Commissioner, NE Zone, Pranay Sinha ajanga SPREE 2025 (Scheme for Promotion of Registration of Employers and Employees) indang maparen tongtipang ana lemsatepa liasü.

Iba scheme ya Union Minister Dr. Mansukh Mandaviya lenisüba kübok Shimla nung 196th ESI Corporation Meeting alidang agizükogo aser July 1, 2025 nungi December 31, 2025 tashi alitsü.

Iba scheme yagi contractual aser khen atema mapa inyaker densema register masü aliba employers aser employees tem tetsübo makai ESI Scheme nung register asütsü khen atema maongka agütsür.

Nagaland nung ESI Scheme ya district ti - Dimapur, Kohima, Mokokchung, Chümoukedima, Niuland, Tseminyu, Wokha aser Zunheboto - nung amshir aser nisung 4,630 nem coverage agütsür aser state nung nisung 17,965 ajangzüker, ta Regional Director, ESIC NE Regional Office, Robert L Guite-i ashi.

Mokokchung DPDB senden menogo



Dimapur, Luroi/August 12 (TYO): August ita atema Mokokchung District Planning and Development Board (DPDB) senden August 12 nü DC's Conference Hall, Mokokchung nung menogo.

Iba senden ya Deputy Commissioner aser Vice Chairman DPDB Mokokchung, Ajit Kumar Verma, IAS lenisüba nung mena liasü.

Senden tenzüka Deputy Commissioner-i züngsem

tasentem aser senden nung adeni arurtem pelashishia agizüka liasü.

Taoba senden minutes lepa repringshiba sülen, KG School Mangmetong aser Model Higher Secondary School Mokokchung na nem grant-in-aid agütsü atema benokba sensak asem aser application ana ya agizüksü telemtetba agia liasü.

Senden nung E.E PWD (NH) Tuensang Division-i, NH-

202 kübok Dikhu ayong nung Bailey apu indang osang agütsü. Board-isa, taruba Departmental Sports Meet 2025 atema sensak asem.

Maneni Deputy Commissioner-i, züngsemtem dang nüburtem tali tajungba tenzüksü aser district lenla ajak nung renloka yoktsü asoshi tebilemdangba tajungtem aser pei department atema sentongtem bener arua lemsatepsü ayongzüka liasü.

Nagaland nung mezüngbuba HNIS awareness sentong agi

Dimapur, Luroi/August 12 (TYO): Startup Nagaland, Department of Industries & Commerce, Government of Nagaland-i ayongzüka anogo asem sentong ka agiogo, koba ajanga entrepreneur, mentor, aser High-Net-Worth Individuals (HNIs) tem sendaktepsüogo. Iba sentong ya Hotel Vivor, Kohima nung August 11 nü state nung mezüngbuba HNIs Awareness Session ka agir tembanga liasü.

Sentong ya Badze Leshüki Campus, Kohima nung Startup Mentorship & Bootcamp 2025 agia August 7 aser 8 nü tenzüka liasü. Sentong nung o jembirtemji Pangerkumzuk Longkumer (Founder, Nexus Cipher Guard), Worrin Muivah (Founder, Step Academy), Dr. Noyingbeni T Erui (Founder, Erui Designs), Dr. Theyiesinuo Keditsu (Academician & Author), Yashika Khatri (Startup India) Nikita Engheepi (Lawyer & Founder, Namaste Hallyu & Pinkbox Events), Rinzing C. Bhutia (Founder & Director, Agapi Sikkim & Trateng Greens Pvt. Ltd.), Syed Mufti

Alam (Access Development Services, IFAD), aser Lichan Humtsoe (Founder, Ete Coffee) nung liasü.

Item session tem ajanga entrepreneur tasentem nem tangazükba balala aika agütsüogo. P. Tokugha Sema (CEO, Startup Nagaland & Director, Industries & Commerce Department), Keneirienuo T. Zatsu (Team Leader, Startup Nagaland & Deputy Director, Industries & Commerce Department), Ikheshe Kahoto (Assistant Director, Industries & Commerce Department), aser Yithule Krichena (Consultant, Ernst & Young) nungeri sentong nung shilem agirtem dang lensayua liasü.

August 11 nü HNIs Awareness Session nung shishilembaba luyim nung lenirtem, yimden yimsüsürtem, legacy families, aser professional tem shilem agi. Nagaland nung iba amala sentong tang mezüngbuba ayongzüka agiogo, koba local alirongsen aser shisatsü yongtsü nung tawa aliba süngdaksütsü atema liasü.

Sentong nung o jembiba mapang CEO, Startup Nagaland aser Director, Industries & Commerce Department, Government of Nagaland, P. Tokugha Sema-i, sentong nung shilem agirtem pelashishia agizük aser parnoki Nagaland rongsenketzüng aser lokti asoshi teyari balala agütsüba atema parnok tenüngsang agüja liasü. Paisa, iba session ya tangsa tang sen intoktsü mapa inyaksüba atema masü saka local alirongsen aser shisatsü longjemba ajanga kechisa koktettsü ali aji sayutsü atema lir, ta ashi.

Pasia, senotsüji kanga tashitait saka kasaji tesendaktep, mentorship aser lensayuba ya-a kanga tashi tait lir, ta ashi. Startups tem aika sen dang nungibo kishi balala lapokyonga aotsü tenüngdakba lir, ta shia pai HNIs tem dang parnok ya temelenshi bener arutsür kaka ama agütsü mepeshia liasü.

Sentong nungsa startups tem nem tetushi agütsü aser networking session ka agir tembanga liasü.

BJP Tuli Mandal-i ayongzüka merekmeju sentong agi



Dimapur, Luroi/August 12 (TYO): BJP ketdangsürtemi tetuyuba agütsüba dak ajemdaker 79buba Independence Day nüngdem nung linük ajunga nung Har Ghar Tiranga Campaign ayongzüka agiba nung shilem ka ama BJP 21 Tuli Mandal-i August 12 nü merekmeju sentong ka ayongzüka agiogo.

Nüburtem nem linük mimdaksütsü, pei khuret angatetdaksütsü aser lokti nem shilem agidaksütsü nükjidong nung iba merekmeju sentong ayongzüka agiogo.

Sentong nung shilem ka ama party züngsemtem aser volunteer temi Tuli ADC & SDO (C) Quarters aser Tuli jila nung GA Guest House merektetja liasü. Office balala mereka toktsütsü atema dang iba merekmeju sentong benoka inyakba masü saka iba ajanga 'Swachh Bharat Abhiyan' atema BJP bendanga agütsür aliba sayur.

Sentong nung o jembiba mapang Mandal lenirtemi, Har Ghar Tiranga Campaign ajanga, linük wako akümtsütsü aser nüjiso atema raratemi pei taküm

bendanga agütsüba lisopurtem nem lephshia metetdaksür, ta ashi.

Parnokisa, iba amala inyakyim ajanga telungjem, yimyayimpong azüoka alitsü aser linük terenlok atema bendanga agüja inyaksü ajungmesor, ta ashi.

Merekmeju sentong ya linük wako atsüketba den sentong nung shilem agirtem ajaki loktilibaren aser terenlok maparen balala nung yakyaka shilem agia linük yangerba nung shilem agütsü nangzükteper tembanga liasü.

East Dimapur Town Council-i metetdaksü

Dimapur, Luroi/August 12 (TYO): East Dimapur Town Council-i sangdong ka ajanga, taruba Independence Day anogomung atema council kübok business establishments ajak dang August 13 nü anepdang 6 ako nungi 8 ako tashi merekmeju sentong ka ayongzüka agütsü ta metetdaksüogo.

Dokan aser shishilemba balala kibur ajak dang atakzüka aliba mapang tsüngda pei dokantem shibanga ayutsü aser iba tongtimbang anogomung

atema jila takokba tashi mereka ayutsü asoshi iba merekmeju sentong nung shilem agütsü tetuyuba agütsüogo

Iba merekmeju sentong ya ward-9 Councillor, EDTC Alemla Tovi-i achaayanga agütsü. Ken o dak sendaka alir ajak dang iba merekmeju sentong takok asoshi teka amteper inyaksü mepeshia metetdaksüogo. Tetuyuba sülen manidakertem anema jenjang tapet agütsü, ta kasa sangdong ajanga metetdaksüogo.



Department of Art and Culture den yaritepa PHED Mokokchung Division-i merükmejuba aser yim tobur jungdaksüba sentong ka Mangmetong yimdak akadang tangokba noksa nung angur. Kasa sentongji Longmisa nunga agi. Ibai Har Ghar Tiranga aser Har Ghar Swachhata Campaign 2025 kübok ayongba sentong ka lir. Sentong nung wako asongba aser nüburtem rongnung telungjem aser merükmejuba tsütsü tenangzüka ka agi. Yim tobur jungdakja tzü pudendak (reservoirs) aser pump house amala nung noksa balala tepa temeket nung naro atem aser noksa agütsü atema photo booth ka yanglua liasü. Mokokchung, 12 August, 2025

Kohima nung State Level Viksit Bharat Yuva Connect sentong agiogo

Kohima, Luroi/August 12 (TYO): Department of Youth Resources and Sports (YRS)-i ayongzüka State Level Viksit Bharat Yuva Connect Programme 2025 Mongolbarnü Assembly Secretariat, Kohima nung agiogo. Iba sentong nung Commissioner & Secretary, YRS, Anthony Ngullie tongti o jembir liasü.

Sentong nung o jembiba mapang Ngullie-i "Viksit Bharat," koba tetezü "Developed India," lir, iba ya sorkar inyakyim ka dang masü saka arok nükjidong ka lir, koba 2047 küm tashi nung linük ya developed linük ka kümdaksütsü asoshi lir. Pai ashiba agi, linük nütsünyongyüks shilem 65 bo lanurtem lir asünung linük temelenshi atema lanurtemi tongtimbang shilem agütsü.

Viksit Bharat Yuva Connect ya, sendaktepsü, empowerment, jenjang agütsü atema sabang ka ta shia Ngullie-i ashiba agi, iba sentong ajanga lanurtem aser linük nung policy yanglurtem debate, quizze, essay tetoktepba aser innovation, sustainability dak sendakba nung pei tebilemba lemsatepba aser lokti temelenshi atema sensaksemstü asoshi lenmang lapoktsür.

Pai lanurtem dang 2047 küm tashi nungbo India ya developed linük ka kümdaksütsü nükjidong aliba ya innovation, entrepreneurship, climate action, aser tebendang makaba terenlok

ajanga tongdaksütsü ajungshia liasü. "Viksit Bharat ya pasasa agi meyangertsü- iba ya nükla, value aser jenjang tapet agiba ajanga yangertetsü," ta shia pai lanurtem dang pungmang pungmanger ka masü saka temelenshi bener arutsür kaka akümtsü ayongzüka.

Iba sentong ya YRS Director Kethosituo Sekhose lenisüba nung agi, Assistant Pastor PCRC Vikhoto Zao-i sarasadem, Youth Resource Officer Naroenla-i lokti pela agizükba o jembir aser NYKS representative Ruokuovikho Chale-i My Bharat Portal indang jemibia liasü.

Viksit Bharat Yuva Connect shibangba sentong nung lanur entrepreneur Thejasevi Putsure-i, Viksit Bharat indang presentation ka agütsü aser Nagaland Legislative Assembly Secretary in-charge Khruohitunuo Rio-i sentepa alirtem ajungshia liasü.

Tetoktepba balala nung takok angurtem:

Youth Parliament: 1st Neiketounuo Thapo, Chumoukedima; 2nd Limugha G, Niuland & 3rd Sentirenla Pienyu, Dimapur

Debate (For the motion): 1st Temnyei M. Konyak, Mon & 2nd Illihima H Yeptomi, Zunheboto

Debate (against the motion): 1st Sashikumzuk, Mokokchung & 2nd Kozo Venuh, Phek.



TIR YIMYIM YIMOBILEM (EDITORIAL)

DIMAPUR WEDNESDAY, AUGUST (LUROI) 13, 2025

E-roll yanglushiba mapang

Tang ya Bihar nung election agitsü ita asem lia Election Commission of India-i voter tenüng ajak khen jungjunga reprangshia inyakba mapang lir. Iba dangji Special Intensive Revision (SIR) ta ajar, ajisüaka iba mapaji Congress teloki anir maginer, kechiyong parnoki iba SIR sentong ajanga parnok vote endoktsütsü aser BJP asoshi vote bendenloksü ta bilemer. Atangji, mapang mapang shia electoral roll reprangshia inyaktsübaji Election Commission of India nem tashi agüja lir, anungji, koba state nung südirsiüaka, election agitsü ita ishika lia electoral roll reprangshia inyakbaji shitak dang. Ajisüaka, opposition teloki Election Commission dak temulung malembaji taoba election agiba nung BJP teloki takok angudak tesem aika nung electoral kanga meshitak yanglua aliba puteta lir. Ibaji anogo ishika jakdang Rahul Gandhi-i osangbenertem den senden alidang yimjak nung metetdaksüba asenoki angashiogo. Atangji, electoral roll reprangshiba mapa ya Election Commission ketdangsüba kübok inyaker aser Election Commission nung ketdangsertemji government-i shimba government nisungtem lir, anungji nisunger yimya agi government nisungi government nung alir ashi angatsü. Aji oda, opposition teloki Election Commission dak temulung melemtetba kija masü saka kuli dena bener arua metetdaksü nungji, Election Commission-ia tatoksa memeshiyonga tesasababo metetdaksütsüla aser linük ajaklen electoral roll shitak küma yanglushitsü sentong renemtsüla. Atangji, electoral roll yangluba inyakyim nung Election Commission dak tashi liaka, parnok inyaknüsü inyaktsüsabo tashi agüja mali. Aji oda, kodangsa Electoral roll reprangshitsü mapa tenzükdir, state shia nung parnok kübok aliba Chief Electoral Officer-temi anir Booth Level Officer-tem tashi dak tashi lir. Ano, electoral roll reprangshiba mapa nung aji tatem masü saka electoral roll tasenba adoktsü aliba nung endoktsüsa mesüra enoksemtsüsa nisung ali mali, itemji ashitsü asoshi nübertem nem mapang agütsür, anungji iba mapang ya senso shiai pei tenüng Electoral roll nung ali asü mali reprangdangtsübaji kanga tongtibang akümer. Atangji, inyakyim nung senso shia nem temeten aser maongka agütsüaka aikati süoki ia mebilemer, anungji electoral roll tasenba nung pei tenüng ali mali reprangtsübaji temulung magütsür. Iba maparen nung ya political party nung lenirtemi kanga temulung agüja inyaktsü nüngdaker. Aji oda, pei alidak electoral roll tasenba yangluba reprangdangi senso ajak maruaka, political lenirtemi oagi electoral roll nungji pei nübertem tenüng ajak züluoka ali mali reprangdanga inyaktsübaji kanga tongtibang teinyaktsü mapa ka asütsü. Aji oda, külen pei nübertem tenüng reprangtsür aser ano külen tangar teloktemi talila tenüng züluoka ali mali reprangdanga , akok tashi, electoral roll ji shitak yangludaktsütsübaji political party nung lenirtem mapa asütsüla. Ajisüaka, political party nung lenirtem aika electoral roll yangluba mapangbo mali ama akümtsü saka election arudangbo kanga tongtibang nisung kümer senzütsü, idangji, ashiko, electoral roll nung pei tenünga malitsüa akok. Iba amaji mataloktsüsa, tang nungi danga asenok ajaki pei alidak electoral roll reprangshia inyakdang temulung agütsütsüla. Tang Bihar nung Special Intensive Revision agiba mapang, ano tanga state-tem nunga electoral roll kangasa meshitaki alibatam Rahul Gandhii tenüng tuteta yimjak nung ashiba agi, pabo government nungi ken o aika arua alitsüa akok, ajisüaka iba mapa aser teindang o jagi India asoshi mapa tajung inyaktsü. Aji oda, tang amai electoral roll nung meshitaki aliba aser Election Commission tamakoktem indang jembidang, memetetika, Aadhar card number amshia India ajaklen Electoral roll shitak yanglutetsü imlar. Atangji, ibai online putu, anungji nübertema pei tenüng reprangtsü, züluoktsü aser endokdaksütsü asoshi online ajanga inyakba inyakyim alinungbo, koda jungla !

OLEMSABANG

Aotsür ajak dang tayongzükba olen kar

~ L. Kika Pongener

Asen Ao limai mezüng Khristan yimsu osangtajung arua, asen tsüraburtemi iba yimsu tajung mezüng agizüka amangba agi, asenok tamang yimsu nung dang masü, shisaliok nunga Naga nunger ajunga dang tamasa tenuk lapoka nuji aküm. Dr. Clark o kinungtsü Mary Mead nati asen Ao lima nung mezüng kaketi-riju lapoka tetsürtem anidena azüngtsü aser zülutsü sayua, Naga nunger tangar kin ajunga dang tamasa shisaliok nung tenuk lapoktsüba atema kanga pela-a tena nem tenungsang agütsür. Yongji, Aotsür-ji Nagatsür ajunga dang shisaliok nung aser lenla ajak nung tamasa tenuk lapoka nuji aküm. Anungji Aotsür-ji tangar kintsürtem dang nungi lenla ajak nung kanga agi temaba aser tajungba asütsüla. Surabangla, tanü Aotsür kechi jenjang nung nokdaka lir (?) Ibaji asenok ajaki khen kanga junga shisadangi. Tanü asen lima sorkar, yimden, arogo aser loktiliba ajunga teyanglushitsü kanga nungdaker. Anungji iba yanglushitsüba nungji tetsürtemi tongti shilem agitsüla aser iba rongnungji Aotsür yakpang asütsüla.

Tanü asen Naga lima nung tetsürtem jenjang asadanga reprangdanga, jokorla, lenla ajunga nung teburtem den küsa kümogo. Tanübo Nagatsür IAS, IPS, IFS, NCS, NSS, NPS, Scientist, Proffessor, Lecturer, Lawyer, Doctor, Engineer, Politician, Doctorate, Reverend etc. aika adokogo. Asen Aotsür-tema tang shiyunga aruba ama Field ajunga nungji aikasa adoka aliba angudang kanga pela-a bilemer aser Tsüngrem tenung kanga asanger. Küm shia HSSLC & HSLC Examination Result nunga tetsürtemi teburtem dang nungi temaba jenjang aser teimba takok anguba ngua kanga pela-a Tsüngrem tenung asanger. Taoba küm Naga lima Jila ajak nung Municipal & Town Council Election agiba nung tetsür nem 33 % balaka shiteta wazüka yutsüba (Reservation Seat) nung tetsür aikati takok ngua Counsellor & Member kümogo. Ano tetsür karibo tebur den küsa 'General Seat' nung toktepa takok ngur Counsellor & Member kümogo. Asen Aotsür-a Jila balala nung Municipal Counsellor & Town Council Member kümogo.

Tang Nagaland Legislative Assembly nung Cabinet Minister Angami-tsür ka Smt. Salhoutunuo Kruse adoka lir. Aser ano MLA & Advisor Sema-tsür ka Smt. Hekani Jakhalu adoka lir. Tena ya tebur den küsasa tokteper adokba lir. Anungji tena ya Nagaland Legislative Assembly nung Nagatsür rongnungi mezüng Assembly nung amenertem asütsü aser Nagatsür rongnung mezüng Cabinet Minister & MLA asütsü. Ano Nagatsür rongnungi Lok Sabha nung mezüngbuba Member (MP) Angami-tsür Smt. Rano Shaiza liasü. Ano tang Nagatsür rongnungi Raja Sabha nung mezüngbuba Member (MP) Konyak-tsür Smt. S. Phangnon Konyak mena lir. Tanübo Nagatsür-a Assembly & Parliament nung amentsüsa adokba ngua kanga pelar aser Tsüngrem tenung asanger....Saka tesasatsü-kaji, asen Aotsür-bo tanü tashi Assembly & Parliament nung amentsüsa ka danga madokba ya kangasa sasa-a bilemer.

Temalen shisemba ama asen Aotsür-a lenla ajunga nung takotet lennir aika atoka lir. Ano asen Aotsür aika International aser National Level nung nungtuko lennir atoka aliba ngua kanga pela-a bilemer. Ajisuaka, ibajagi teperi masü, kechiyong Aotsür-ji Nagatsür ajak dang tamasa shisaliok nung tenuk lapoka nuji akümba kin lir. Anungji Nagaland Legislative Assembly nung Cabinet Minister & MLA Aotsür-a karbo atoktsüla. Aser General Election nunga suang, Municipal & Town Council Election nunga suang, tetsür nem balaka shiteta yutsüba 'Reservation Seat' nung atokba-jia kanga junger, saka Aotsür-ia tebur den küsa 'General Seat' nung tokteper karbo atoktsüla. Tangar kin-i koker kodaser Aotsür-ibo makoktsü (?) Aotsür-ibo tangar kin-tsür amaji 'General Seat' nung tokteptsü makoktsü asü (?) Aotsür dakbo tangar kin-tsür dak aketba sempet aser tashitemetet mali asü (?) Aotsür dakbo tasü-tait aser temulongtetba mali asü (?) Anungji Aotsür ajunga khen kümshitsü mapang kati menupogo.

Tanü asen Naga lima yimden, arogo aser loktiliba ajunga nung ochishir lennir agi kanga anungakonger. Tanü asen Naga lima sorkar nunga yimsusur teimba kati pei ajungtsü asoshi dang bilemer. Yongji, opposition maliba sorkar yanglur, tesasatsüka, temetongshir kata mali asen lima terenloksü tim merenloki rajang küma lir. Anungji asen lima yanglushitsü aser renloksü asoshi Nagatsürtemi tongti shilem agitsüla, aser iba rongnungji asen Aotsür yakpang sur anitsüla. Jokorla, Aotsür-ia Nagaland Legislative Assembly & Indian Parliament nung tongti shilem agitsü mapang tongja tongogo. Taruba General Election nungjibo Aotsür-ia tebur den küsa tokteptsü tasü-tait aser temulongtetba alitsüla aser Minister & MLA karbo atoktsü yimla-a atadi. Ano Lok Sabha & Raja Sabha nung oa Member (MP) mener tongti shilem agitsüa karbo atoktsü Aotsür ajak dang ayongzük aser ajungshir.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Venezuela nung Khristantemi 'March for Jesus' rally agi



Venezuela yimtiba, Caracas nung Khristantemi 'March for Jesus' rally nung shilem agidang tangokba noksa nung angur.

August 12, 2025: Venezuela tesem ajaklen evangelical Khristantemi 'March for Jesus' rally nung shilem agi; iba anogomong ya 'National Day of March for Jesus' asütsü Tiri sign süa sorkari official süa agizükogo.

"Jesus, the nations belong to You" omen nung ajemdaker Honibarnü (August 2) linük tesem ajaklen Khristantem longjemer iba anogomong among.

Iba anogomong ya küm shia August ita mezüngbuba Honibar anogotem nung amonger.

Latin Evangelical Alliance (AEL)-i ashiba agi, state 23 prongla nung aser Capital District nung nung evangelical Arogotem nungi Khristantemi iba sentong nung shilem agi.

Iba sentong nung tanga bendanger tamangertema aden. Parnoki ozülu, wako aser iba sentong omen ajenloka aliba tola semer shilem agi.

Parnokisa "Yisu Khrista ya Kibuba aser Kümtetdakba" ta zülua aliba tola semer liasü. Yimdong süa jajaba mapang nung parnoki ken aten, sarasadem aser nüburtem longjemtsü atema ayimdena liasü.

Taküm iba anogomong omenji "Yisu, iba linük ya Nü meyong" liasü.

Venezuela yimtiba, Caracas nung Khristantem telok ana tesem balala nungi apusoa liasü aser tatemsa Libertador Avenue nung adenshiba sülen tekülem sentong ka agiba den Laishiba azüng aser Venezuela atema sarasadema sentong tembanga liasü.

Iba sentong takok angutsü atema Arogotem aser Christian ministries aikati lenmang balala ajanga yaritepa liasü.

Anzoátegui state nunga iba sentong kanga takok ngua agiogo. Barcelona, Lecherka aser Puerto La Cruz municipalities nungi Khristantem local sports complex nung adenshia iba sentong agi. Iba sentong nung kibongtem, tanurtem, tailonglongpurtem, teintet sensotem, Arogo lenirtem aser sorkar ketdangsertem aikati

shilem agi.

March for Jesus sentong ya yimtitem nung dang masü saka jila aser yimtsüngtem nunga mongogo.

Cumana nung ayongzükba sentong nung Evangelical Council of Venezuela (CEV) nung executive director, Pastor José Piñero-i Tsüngrem O jembia liasü.

Pastor Jose-i, "Kibuba taochi agi alangzükba Khristantem ama asenok yangi adenshia lir. Asenok yangi lir, kechiyong iba linüki teimla atema ayimdener," ta ashi.

"Asenok yangi aliba ya asenok temsüa aliba agi masü saka Tsüngrem taochi agi lir. Iba taochi ajanga denominations balala nungi süaka ajak longjemdaksür. Asen tai atokba, teimla aser tesünep ajanga asenok yagi lir," ta pai ashi.

Iba sentong ya Khrista tiyongtsü südaktsütsüla, ta shia pastor Jose-i, "Asen nija

Arogotem mesüra denomination tenüng nung asenoki shilem agir masü saka Yisu Khrista atema shilem agir. Pai tasü madak takok angu, tasemnübuba nung shia aru aser Pai temenen madak takok nguogo," ta metetdaksü.

Paisa, "Iba sentong ya tema tazütsü sayutsü atema masü, saka tepela nung Khrista atema benjungba lir," ta metetdaksü.

Iba sentong tembangba sülen linük Tir, Nicoljş Maduro-i social media ajanga iba sentong ayongzükertem dang pelaba metetdaksü.

Tiri, "Tsüngremer tesangwa nung asenok tejakleni aoer, ajemalua takok lenmang nung jajar aser moatsür. Asenok ya Tsüngremer nüburtem lir," ta metetdaksü.

Nisung aikati, iba anogomong ya Venezuela sorkar aser evangelical Arogotem tsüngda tesendaktep nung alizüng ka lir ta bilemer.

ANOGO ABEN TSÜNGREM DEN

Aonung Ka (T.Ken 74:12-23)

"Aji saka akhi nungi Tsüngrem kü chuba lir, ali rongnung Pai teküzmük inyaker" (t.12). Babylon nunger Yirusalem yimti aser tekülemdak repranger Asaphi ibai zülu. Tekong 1-11 nung tarak aser azüngmeyaka aliba pai reprang. Pai Tsüngrem ki tsükchirtemi raksatsüba angu. Babylon nungeri Tsüngremer nisan endoker, parnok meyong nisan asongba angu. Yirusalem tobur tajung aser tamaren ajak mokozü aküm. Kodang nai tsükchirtem raksatsüba aser parnoki awabangba na meketa ngudir, "Akhi nungi Tsüngrem chuba aser pai tekümtet mapa inyaker ta bilemtettang" (t.12).

Tekong 12 nung Asaphi meketa reprangba anener anünglen reprang. Tsüngrem chuba menden nung lir ta pai bilemtet. Mapa kar nung asenoki ayimtener, "Kobika, O Kibuba? Kobika? Kechiba item mapatem ataloker? Kechiba nai kecha meinyaker?" Kechiba Pai Babylon nunger dang Yirusalem aser tenla ki raksatsütsü Tsüngremi mela asenoki metet:

Tanela nung lenirtemi kin mashileni ani, süngyanglu külem aser Tsüngrem sensamasatsü, anungji Tsüngremi parnok azüok. Asaphi anünglen reprang aser ashi, "Tsüngrem Chuba lir. Pai kodanga tamakok maludaktsür, aser Pai tekümtet inyaker. Tsükchiri teraksa map inyaktsü akok, saka kü Tsüngrem chuba lir, aser alima nung Pai tekümtet inyaker."

Tasembuba, Asaphi tajungshibaji, tesüiba nung Tsüngremi kechi inyak bilemtet (t.13-23). Tsüngremi Temerem Tzüyim lemdang. Pa nübur amaker, tsükchirtem jenshidaktsür. Pai arem ajanga nüburtem ani. Pai lung nungi tzü adokdaktsü. Pai ayongtem kongdaktsü. Tekong 16 nung ashir, "Anogoji ne meyong, aonungjia ne meyong." Asenoki anogoji aginer saka aonung maginer. Tsüngremi anogo aser aonungji azüoker ta bilemtetang. Asaphi pa meketa aliba ajak raksar angudang pa aonung ka ajanga ao. Pa telemtetba kechi liasü? "Aji saka akhi nungi Tsüngrem kü Chuba alima nung tekümtet inyaker (t.12)."

Tsükchiri ne taküm nung teraksa inyaker asü? Iba ken tajungshiba nung azüitang: Tsüngrem chuba menden lir; Pai yarir aser na kümzüker; aser tesüiba nung inyakba ama tanga inyaktsü Pa tamang katetba lir. Ne taküm nung pai azüokba bilemtettang. Na yaritsü Pa dang asüngdangang, aser tesü ne tamang Pa nem agüjang.

Yaküm US nung Arogotem anema inyakba tatalokba 400 liasü

August 12, 2025: Yaküm United States nung Arogotem anema inyakba tatalokba 400 dak tali liasü; talisa prangpong amshiba tatalokbatem kanga bulua kümogo, ta Family Research Council-i report ka ajanga metetdaksü.

"Hostility against Churches in the United States" report ji Hombarnep saya. Iba report nungji Tenla kitem bensatsüba, mi agi rongdoktsüba, prangpong amshia amokmerenba, bomb ajanga amokmerenba aser Khristantem dak teka sangshiba tatalokbatem metetdakja lir.

Washington nung amenoka aliba Christian advocacy organization, Family Research Council-i US nung state 43 nung Arogotem anema inyakba tatalokba 415 metetdaksü. Item tatalokbatem ajanga Arogo 383 kongshi/takoksa angu.

2023 küm nunga US nung Arogotem anema inyakba tatalokba 485 liasü, anungji iba denji medemdangra 2024 küm item ama tatalokba tera agi tajemba liasü.

2018 küm January ita nungi

tenzüka tang tashi nung US nung Arogotem anema inyakba tatalokba 1,384 liasü, ta parnoki metetdaksü.

"Arogotem anema inyakba tatalokba ajakjibo Khristan yimsü sempaba agi masü. Tatalokba karbo auyatsü atema liasü aser tatalokba karbo tainlonglongpurtem salepsariba lir," ta report nung shia lir.

"Ajisüaka tatalokba karbo metetsümonga Arogotem anema tebilemba tamajung nung inyakba lir. Kechi nükjidong nung inyakba südir süaka item tatalokba ajanga Arogo kiojen aser rongsen takoksa anguba den tamangertem melungsentsü yirutsür. Arogo karibo Tenla kitem süshitsü atema timtem ajangshir," ta report nung shia lir.

2023 küm prangpong amshiba dak sendakba tatalokba 12 dang liasü, ajisüaka 2024 küm nungbo prangpong amshiba tatalokba 28 liasü.

Tatalokba ka nungbo, Pittsburgh, Pennsylvania nungbo Jesus' Dwelling Place Church Tenla kidang pastor-i

sayutsüngi tesüdak mapang nung nisung ka Tenla ki telungi atuba sülen pastor khasettsü merang, saka deacon kati nokdangteta liasü.

Georgia nunga nisung kati prangpong amer Tenla ki asem nung timtem agüja liasü. Pai item video ji tangok aser tangartem danga yamaji inyaktsü ajungshia liasü.

San Francisco, California nunga nisung kati St. Augustine Catholic Arogo Tenla ki kishi nung injang aiben khaloktsü. Houston, Texas nunga tetsür kati prangpong agi Lakewood Church nung nisung ana yiruja liasü.

Yaküm US nung Arogotem anema inyakba tatalokba 284 bo Tenla ki raksatsüba, kürakyanglu raksatsüba, tagitarutsü auyaba aser air conditioning units auyaba tatalokbatem liasü.

Ano item tatalokba 55 bo Tenla ki rongdoktsüba mesüra rongdoktsütsü merangba tatalokbatem liasü.

Athens, Tennessee nung St. Mark AME Zion Tenla kidang

mi senoktsüba ajanga Tenla ki telung aser kilem kanga mejungi arung. Mi senoktsüsang jagisa Arogo Secretary Lina Buchanan tepseta liasü.

Florida nunga tetsür kati Believer's Joy Tenla kidang mi senokja liasü.

Ohio nunga county ana nung Tenla ki pezü rongdoktsü; item tatalokba ajakji kasa nisung kati dang inyakba asütsü südi, ta bilemer.

Iba dak alia bomb agi Arogotem amokmerenba tatalokba 14 liasü.

Family Research Council Tir aser taoba mapang U.S. Commission on International Religious Freedom chairman, Tony Perkin-i, "Iba report ya ajanga yangi (US) tamangba yimsü temeden amokmeren nung aliba kuli sayur," ta metetdaksü.

Paisa, "Trump administration-i meranga inyakba atema onoki tenünsang agütsür, ajisüaka yimsü temeden kümzüktsü atema sorkar level ajak nung inyaktsüla," ta ashi.

AO OSHI ANGAZÜKDAK:**TANÜ ANGAZÜKTSÜBA OJANG****Teset**


(n) tepzüno komo nung aliba teling (boil carbuncle)

* Teset agiteta endokra tepzüno jungadoker.

Teshima

(adj) süoshi raksaba, sü shidangba (torn apart)

Obalabo tula teshima ka semer mapai ao.

OLONG PAITEP # 7238**TIPLÉN**

1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

LANGTSÜNGLEN

2. Hai sür inyak
3. Aor tenüng ka
4. Ali telungi talangka lur
5. Tebang kenyongi mazüoker
8. Ken atema anenzükertem
9. Toktepa noktak
10. Sen
11. Benjong agi
12. Telung nung rizünga ayu
13. Tebang nung enok

OLONG PAITEP # 7237 TELANGZÜBA**TIPLÉN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket,
14. Mangu, 15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

**SHIBA METENTSÜTSÜ, OCHI, SHIDAKBA****Ochiba** : Alima nung kanga anünga alibaji ochi.**Shidakba** : Hai temba na kanga tasaya aji tiyazü.**Ochiba** : Nai kodashür yamaji anema aposur?**Shidakba** : Nai ni anema tasaya no, nai matongar**Ochiba** : Temba na kangabo tejashi no na ya mopongla süngar**Shidakba** : Aree atangji süti? Nai ni yamai mezügmeshitsü no?**Ochiba** : Masü temba na yakta tenüng menüksü, saka ni mashitsü**Shidakba** : Hai temba ana yamai raratepyonga, oda anaprong lenmang kar atema longjemti koda?**Ochiba** : Kechi lenmang atema longjemnür aji?**Shidakba** : Na joko election tonga arur, aser election-i aitsürpur takar kati kü dang pa rongsen ajak ni amshia voters ayongang ta mepeshir. Anungji ana külemi sür yariti koda**Ochiba** : Kü lenmangbo yamaji masü, kü lenmangbo RCC talai.**Tangatettsü** : Nisung tsüngdang shidak mesükba lenmang ka lir, saka iba tatembangji tasüba lir. Saka Ochibai kin ka ajungketer. Naia koba shimtsü molunger?**Lilir : N. Saku Imsong , 4th Mile, Diphupar****Tripura CM aser South Korea Ambassador na senden amen***Republic of Korea Ambassador Seong Ho Lee-i Tripura Chief Minister Manik Saha den ajurutepba noksa nung angur.*

Agartala, Luroi/August 12 (Agencies): India dangi Republic of Korea Ambassador Seong Ho Lee-i anir lenir aseme Hombarnü state secretariat nung Tripura Chief Minister Manik Saha den ajurutepogo.

Senden nung Chief Minister-i India aser South Korea na tesendaktep tajung aliba indang lemsatep. Paisa, Tripura aser South Korea na shishilembaba tsütsü tesendaktep yangluba ajanga linük ana tesendaktep ya tashi taitba akümtsü ta ashi. CM-i, Tripura rongsenketzüng aser

lokti libaren terenlok, connectivity tajungba akümba aser industry aser saisabong amala wadang nung renloka aoba indang metetdaksü.

Tripura sorkarisa, Korea indang Ambassador nem state indang takar sobaliba, industry balala lapoktsü, tourism jenjang ajungketsü aser transportation infrastructure tajungba küma yanglushitsü atema lenmang sadema lapoka aliba indang metetdaksü. Telok anapronglai South Korea aser Tripura dak sendakba nung arok tejangraba

onük balala benoka sensaksema liasü.

Senden nung Public Works Department Secretary Kiran Gitte-a dena sensaksem nung shilem agia liasü.

Temetettsü kaji Tripura ya project balala atema Germany aser Japan na den longjemer inyakdar. JICA aser Indo-German inyakymtem ya state nung arem nung alirongsen balala aliba dak rangloker inyakdar. Aluyimba nung Tripura ya Israel aser Netherlands na den longjemer project balala inyakdar.

Manipur Police pongu mapa nungi suspend sütsü

Imphal, Luroi/August 12 (Agencies): Manipur Police-i, police inspector ka aser India Reserve Battalion (IRB) Jemadar ka densema personnel pongu mapa nungi anentsüogo. Temesepba mozü shibelenba ken o nung sübokrem agiba ken o ka tema adokba sülen iba jenjang agiogo.

Director General of Police (DGP) Rajiv Singh-i, Imphal East nung Commando Unit officer-in-charge Inspector Ningthoujam Devdas Singh mapa nungi suspend sütsüba tetuyuba August 10 nü agütsü. Department-i ashiba agi pai aibelen tulu mena aser ibayongji pa tangsa tang mapa nungi suspend sütsüogo.

Imphal East Superintendent of Police Rakesh Balwal-i ashiba agi, department-i ano tasüngnü ketdangsür pezü

suspend süja liasü. Ketdangsürtem rongnung Imphal East Commando Unit nungi Sub-Inspector B. Debson Singh aser Constable Tarique Aziz, Thoubal Commando Unit nungi Head Constable Md Rakib aser Khabeisoi, Imphal East nung amendaker aliba Manipur Rifles 7th Battalion nungi Jemadar Md Amin Shah nung densema liasü.

Item ketdangsürtem yagi National Highway-102 (Indo-Myanmar lenmang) nung apuba temesepba mozü shibelenertem chioksü atema sübokrem sen lakh 6 agi aser parnoki apuba temesepba mozü ya ayu, ta jangja akümba sülen parnok anema jenjang agia liasü.

Manipur Police-i ashiba agi, parnok inyakym ya temzüng ozüng benoka inyaksangshiba ketdangsür kati

inyaksangshitsüba yimya ka masü.

Assam Police Manual Part-III kübok Rule No. 66 dak ajemdaker ketdangsür ponguprongla nem jurila suspension order agütsüogo. Osang tejangja ka magütsü tashi parnok suspend sütsür atatsü.

Suspend sütsür aliba mapang parnok pongupronglai pei pei police headquarters nem osang agütsütsüla aser ketdangsürtem nungi temelaba magi toktsür maotsüla. Parnok nem service regulations dak ajemdaker subsistence allowances agütsütsü.

Sub-Inspector Debson Singh ya taoba mapanga iba amala ken o nung aija lir. 2013 küm pai sen crore 3 alang pseudoephedrine tablets Moreh-i shibelener aoba atema pua liasü.

Tinsukia nung ULFA linkman ka apu

Digboi, Luroi/August 12 (Agencies): Independence Day atongtsü lia meita aoba sentong tesashiba benoker inyakba mapang security forces temi Assam kübok Tinsukia district nung United Liberation Front of Asom (ULFA) linkman ka puogo.

ULFA atema inyaksangshir asütsü ta temulung melemi bilemba nisung ka senzusenpongba indang osang tejangja angazükba sülen iba nisungba ya Mongolbar anepdang Digboi nung apu.

Security forces temi iba nisungba ya Tingrai anasa Raiding yimtsüng nung apu. Tingrai nung ya 79buba

Independence Day amungtsü lir.

Tinsukia nung Additional Superintendent of Police (Headquarters) aser par team-i iba nisungba ya alu ka nung apu.

Pa ya taoba mapang ULFA telok züngsem ka liasü aser pai pa taoba iba telok den sendaktepa aliba nangzükogo. Pa Sivasagar district nungi lir.

Ketdangsürtemi iba nisungba maitsü ya memetetdaksü, kechiyong ken o tang bushisüngdangba mapang lir.

Iba nisungba apuba ajanga iba tesem tali kümkümdaktsüogo, kechiyong pa ya ID amungtsü aliba Tingrai

General Ground nungi km 5 dang pilar apu.

"Independence Day matong tsüngda telungpurtem inyakym kar danga lir aji nokdangtsü atema meita aoba nung nisung apuba aser ken o ashshiba ya shilem ka lir," ta Superintendent of Police Gaurav Abhijit Dilip-i ashi.

"Onoki district ajak nung jenjang tapet agidar. Security inyakym ajak akangshiogo aser temulung melemi bilemertem senzusenpong kanga junga meita atadar. Iba anogo yimjung nung amungtsü atema nüburtemi teka amteper inyaktsü kanga tongtibang lir," ta pai ashi.

Dr T Ao Trophy: Mokokchung SF-i iogo; Wokha & Kohima asaya thinen



Kohima, Luroi/August 12 (TYO): Mongolbarnü Dr T Ao Trophy 2025 - Inter District Football Championship quarter final asaya tasembuba nung Mokokchung-i Peren koka semi-finals-i iogo. Taküm iba asayamung ya Kohima District Planning and Development Board-i host süa Indira Gandhi Stadium Kohima nung asayadar.

Quarter final asaya tasembuba nung Mokokchung team-i asaya mekoki aliba nungi meyipa tur tie-breaker nung Peren team goal 5-4 agi kokogo. Atakzükja aliba asaya mapang tembangba den minute 15 apuloktsür asayaba tashi nung team anaprongla goal 2-2 idaktsüba sülen tie-breaker

asayatsüsa aküm.

Asaya nung mezüngbuba goal ya Nrakhak-i Peren atema minute 32buba nung idaktsü. Ajisüaka asaya mezüngbuba shilem matem tsüngda T o n g p a n g n o k d a n g - i Mokokchung atema goal ka idakja goal kasasa aküm.

Asaya tanabuba shilem tenzüker minute 50buba nung Nrakhak-i Peren atema tanabuba goal idakja parnok maneni tejakdang aküm, ajisüka ano Takotuba-i minute 64buba nung Mokokchung atema tanabuba goal idakja goal kasasa aküm aser iba sülen mapang talila apuloktsür asaya liasü.

Tie-breaker nung Mokokchung team nungi asayar ajaki goal idaktsü aser Peren-i

goal pezü dang idakja liasü.

Asaya tanabuba nung Minister for Tourism and Higher Education, Temjen Imna Along match patron liasü.

Wokha aser Kohima tsüngda tatembangbuba quarter final asaya ya Bodhbar anepdang 8:30 ako nungi asayatsü atema thinenogo. Asaya anenba mapang tashi nung team anapronglai goal kaka idaktsür liasü. Tzüsü kanga alongba ajanga kecha mongui akümba sülen asaya ya thinenetsüsa aküm. Asaya ya Bodhbar anepdang tanungba minute 15 asayatsü.

Aug 13 nü semifianl asaya:

1. Mon vs Mokokchung @3pm
2. Chümoukedima vs Wokha & Kohima asaya takoker @6pm.

Cincinnati Open: Sinner, Fritz, Tiafoe nungeri takok angu



Jessica Bouzas Maneiro

Luroi/August 12, 2025 (Agencies): ATP aser WTA Cincinnati Open nung Hombarnü tebur kija asaya nung Jannik Sinner-i 6-2, 7-6 (8/6) agi Gabriel Diallo madak takok nguogo.

Asaya nung Sinner 4-2 agi tejakdang aliba mapang electronic line-calling system audio shilem nung timtem adokba sülen asaya ya khen atema sota ata liasü.

Court tezülen asayar ana tesülen LED screens remshiba ajanga minpronga liasü, saka tenapronglai system medeni dang asayatsü mulunga agizüka liasü.

Ghonda ana tejakdak power makai akümba ajanga asaya minute 75 tashi masayai anena ataba sülen iba timtem ya adoka liasü.

Tebur kija asaya nungsa fourth seed asayar Taylor Fritz-i, 7-6 (7/4), 7-5 agi Lorenzo

Sonego kokogo, koba pai taküm asaya 25 nungi 21buba akokba liasü.

America nungersa Frances Tiafoe-i 6-4, 6-4 agi minute 82 agia Ugo Humbert kokogo aser pa taruba round nung Holger Rune den asayatsü, shibai 7-6 (7/4), 6-3 agi Alex Michelsen kokogo.

Kasa asayamung tetsür kija asaya nung top-ranked Aryna Sabalenka-i ghonda asem asayaba sülen Emma Raducanu 7-6 (7/3), 4-6, 7-6 (7/5) agi koka iba asayamung round pezübuba tongtetogo.

Maneni tetsür kija asaya nung Australian Open champion Madison Keys-i game pezü dang mekoki Japan tsür Aoi Ito kokogo.

Spain tsür Jessica Bouzas Maneiro-ia America tsür Taylor Townsend 6-4, 6-1 agi ayong ayonga kokogo aser la Bodhbarnü Sabalenka den asayatsü.

Gill nem ICC men's Player of the Month naroküm agütsü

Luroi/August 12, 2025 (Agencies): Anderson-Tendulkar Trophy nung otsü tasen yanglua kanga junga asayaba sülen Shubman Gill nem July ita atema ICC Men's Player of the Month naroküm agütsüogo. Indian Test captain yagi iba naroküm atema England nunger asayar Ben Stokes aser South Africa nunger asayar Wiaan Mulder na ajateta liasü.

Arishi küm 25 tain India team captain yagi July ita kanga junga asayaogo aser Test asem nung run 567 yuangua pa indang average 94.50 liasü. July ita pai innings trok nung double century ka yangluba den century ana yanglua liasü.

Gill-i tang agi pezübenbuba ICC Player of the Month award agizükogo. Pai 2025 küm February ita, 2023 küm January

aser September ita iba naroküm agizüker liasü. Pa ya tebur asayartem rongnungi iba naroküm pezübenbuba agizükba mezüngbuba asayar kümogo aser tetsürtem rongnungi Ash Gardner aser Hayley Matthews na den denogo. Tenatia iba naroküm pezüben agizüker lir.

Edgbaston nung India-i asaya akokba mapang Gill-i tongtibang shilem agia pai mezüngbuba innings nung run 269 yanglu aser tanabuba innings nunga run 161 yanglua liasü. Pai innings ana nung run 430 yangluba ya Test puti otsü nung Graham Gooch (456) sülen asaya ka nung run timtiba yangluba tanabuba lir.

Edgbaston nung Gill-i otsü tasen aika yangluogo. Pa ya England nung Test double century ka yangluba mezüngbuba India team

captain aküm, aser Virat Kohli sülen India nunger captain rongnungi India adena or double century yangluba mezüngbuba asayar aküm.

Paisa, Sunil Gavaskar-i taoba mapang run innings ka nung 221 yanglua aliba ajateta India nunger asayartem rongnungi England nung Test asaya nung run timtiba yangluba asayar kümogo. Iba den bendenloksema pai Asia adener India nunger rongnungi Sachin Tendulkar-i run timba yanglur aliba pai ajatetogo.

Lord's nung run 16 aser 6 dang yangluaka Gill-i Old Trafford nungbo kanga junga asaya-a tanabuba innings nung run 103 yanglua liasü.

Gill-i Test asaya pongu nung run 754 yanglu aser pa indang average 75.40 liasü aser ibayongji pa nem Player of the Series naroküm agütsü.

BENDANGLI OSANG : Tapak 7 nungi...

USaser China 'trade truce' anogo 90...

Aser China-ia US firms temi rare earths minerals tem alizükba temelaba kumdaktsütsü mulung.

May ita nunga US aser China ya rongsenketzüng tsütsü mepetmesü tulu ajurutsü aliba kati ka dak tariffs tesashi meshia aliba anena paidok, kong China dang shilem 145 aser US dang shilem 125 meshitsü sangdonger liasü.

Item 'triple-digit tariffs' yagi United States aser China tsüngta shishilempaba tatem kati arutsü jenjang nung liasü. May ita Geneva nung senden amendang parnoki tangatettep

kati arua America-i shilem 30 aser China-i shilem 10 meshitsü lemtet.

Linük ana tsüngta kati ka akoksatsütsü tashi lir ta ajiteta joko jembishinü tenzüka lir.

Ajisüaka Washington aser Beijing tangatettep kati arutsü asü masüar mejangja. China-i intellectual property rights kumzüka ayuba aser Beijing indang subsidies aser danga industrial policy tem ajanga world market nung China nunger firms tem tajangzük tulu ngia taoba küm China den shishilempaba nung US trade deficit \$262 billion liasü ta ashir.

BILEMDANGANG

"Azümesenba agi nisung ka nükjidong remsepdaktsür,"